

Periusissiaq

Inatsisartut 2019-imi upernaakkut ataatsimiinneranni Inatsisartut isumaqatigiittut aaliangerput nunamut tamarmut atuuttussamik pimmatiginnittarneq akiorniarlugu periusissiortoqassasoq. Periusissiaq meeqqanik inuusuttunillu ilinniartitsiffiusunut tamanut, tassa ulluunerani neqeroorutinut, atuarfinnut kiisalu inuusuttut ilinniarsiinut sammisuussasoq aaliangiunneqarpoq.

Taamani Naalackersuisuusut kissaatigaat, suli atualingitsut, meeqqat atuarfiat kiisalu inuusuttut ilinniarsii pillugit tamakkiisumik isiginnilluni periusissiaq siammasissuullunilu tamatigoortuusariaqartoq, taassumalu suliarinera naalackersuisoqarfiit akimorlugit Naalackersuisut, kommunit soqutigisallillu allat akornanni qanittumik suleqatigiinnikkut ingerlanneqartariaqartoq. Taakkua pimmatiginninnermik pinaveersaartitsillutillu akiuniartuupput Ilinniartitaanermut Aqutsisoqarfik suliamik akisussaasuutillugu ingerlatsisuutillugulu.

Periusissiaq Nunani avannarlerni pimmatiginnittarneq pillugu ilisimatuussutsikkut ilisimasat nutaanerpaat aallaavigineqarput, aammalu meeqqat, inuusuttut inersimasullu akornanni maani nunami pimmatiginnittarneq pillugu misissuisimanernit.

Pimmatiginninnermik akiuniarluni sulinermi inuiaqatigiit ataatsimoorlutik susassaqarfigalugulu akisussaaffigigaat periusissiami pingartinneqarpoq. Piviusunngortitsiniarneq augustimi 2022-imi aallartinneqarpoq, ukiunilu pingasuni sivilisussuseqassalluni. Ukiut pingasut siullit piviusunngortitsiniarfittut isigineqassapput, innersuussutit aallaavigalugit nunami najukkami nunalu tamakkerlugu suliniutinik aallartisaanikkut.

Periusissiaq tamakkiisoq uunga aajuk: [Pimmatiginnittarneq akiorniarlugu periusissiaq nutaaq \(iserasuaat.gl\)](https://iserasuaat.gl)

Periusissiaq eqikkagaq uunga aajuk: [Nuna tamakkerlugu pimmatiginninneq akiorniarlugu periusissiaq \(iserasuaat.gl\)](https://iserasuaat.gl)